



## Mwalimu Aliyetumwa na Mungu

**T**wajua ya kuwa u mwalimu, umetoka kwa Mungu; kwa maana hakuna mtu awezaye kuzifanya ishara hizi uzifanyazo wewe, isipokuwa Mungu yu pamoja naye.—**Yohana 3:2.**

Yesu alidumisha utulivu thabiti pande zote kwa huruma Yake ya ajabu kwa wengine. Alifanya mema kwa utulivu na ustahimilivu wa kudumu usioweza kamwe kulinganishwa na mwanadamu yeyote. Mafarisayo na Masadukayo siku zote walimfuatilia; na wengi wao, waliposikiliza maneno Yake, na kugundua utulivu Wake, hata pale aliposhambuliwa na watu waliojawa na hisia kali na wasio na adabu, walimwamini Yesu....

Dharau na uchungu wote ambao Yesu alikabili na kila siku havikuweza kumwibia utulivu Wake. Alipotukanwa, hakurudisha matusi.... Kamwe hakuwahi kuvuka mipaka ya heshima. Je! Alikuwa ni nani? Bwana wa mbinguni, na Mfalme wa utukufu. Dhoruba iliyoinuliwa na wapinzani wake ilimpiga, lakini hakuijali. Aliweza kuwa mtulivu; kwa maana alikuwa ni mfano halisi wa ukweli.

Na wale ambao leo wanabeba ujumbewa ukweli kwa ulimwengu wanalazimika kujifunza maisha ya Yesu, na kuweka katika vitendo mafundisho Yake. Kamwe msisahau kuwa ninyi ni watoto wa Mfalme wa mbinguni, wana na binti wa Bwana wa majeshi. Dumisha utulivu kwa Mungu, hata pale unapokabili na wale ambao wanaongozwa na nguvu kutoka chini ili kuutetea uongo. Hakikisha kwamba silaha bora zaidi walizo nazo haziwezi kuuharibu ukweli, hata kama watajitahidi kuutia giza kwa kuuwasilisha vibaya. “Mungu akiwapo upande wetu, ni nani aliye juu yetu?” ...

Alikuwa ni mwalimu aliyetumwa na Mungu ili kuwafundisha wanaadamu. Akiwa ni Mmoja ambaye ndani Yake nguvu zote za urejeshaji zilipatikana, Kristo alizungumza juu ya kuwavuta watu wote Kwake, na juu ya kuwapa uzima wa milele. Ndani Yake uko uweza wa kuponya kila ugonjwa wa kimwili na kiroho.

Kristo alikuja katika dunia yetu akiwa na utambuzi wa juu zaidi kuliko ukuu wa mwanadamu, ili kuitimiliza kazi ambayo ingekuwa na matokeo ya milele. Je! Unakutana Naye wapi katika kuifanya kazi hii? Katika nyumba ya Petro mvuvi wa samaki. Akiwa amepumzika katika kisima cha Yakobo, akimpatia mwanamke Msamaria maji ya uzima. Kwa ujumla alikuwa akifundisha katika eneo la wazi, japo wakati mwingine Hekaluni, kwa kuwa alihudhuria makusanyiko ya Wayahudi. Lakini kwa matukio mengi Alifundisha akiwa ameketi mlimani, au ndani ya mashua ya wavuvi. Huruma yake ilitolewa kwa ajili ya wahitaji, wanaoteseka, waliodharauliwa; na wengi walivutiwa Naye.... Na kwa wale ambao wanatamani kupata pumziko na amani leo sawa tu na wale ambao walisikiliza maneno Yake kule Yudea, anawaambia, “Njoni kwangu, ninyi nyote msumbukao na wenye kulemewa na mizigo, nami nitawapumzisha” (The Signs of the Times, Juni 24, 1897).